

摛藻堂四庫全書薈要

史部

欽定四庫全書  
薈要卷五千六百六十

史部

宋史卷三十二

元中書右丞相總裁托克托等修

本紀第三十二

高宗九

三十一年春正月甲戌朔以日食不受朝丁丑雷丁亥  
免湖州增丁所輸絹夜風雷雨雪交作辛卯詔江浙官  
民戶均輸和市純帛壬辰劉寶落節鉞福建路居住丙

申大雨雪給三衙衛士行在貧民錢及薪炭命常平振  
給輔郡細民諸路監司決獄己亥放張浚胡銓自便庚  
子禁淮南拘籍戶馬二月戊申復置邛州惠民監癸丑  
以趙密領殿前都指揮使甲寅罷楊存中殿前都指揮  
使進太傅爲醴泉觀使封同安郡王丙辰置行在會子  
務乙丑復鬻僧道度牒詔分經義詩賦爲兩科丙寅詔  
通進司承受內降文字並囊封送三省樞密院辛未秦  
熿卒贈太傅三月甲戌朔命破敵軍統制陳敏部兵屯

太平州己卯官勲臣魏仁浦馬知節余靖寇瑊諸孫各  
一人選文臣宗室主西南外兩宗司庚辰禁兩淮抑民  
附種以利州西路御前諸軍都統制吳拱知襄陽府部  
兵三千戍之壬午以兵部尚書楊椿參知政事丁亥奪  
秦嬉贈官及遺表恩賞庚寅以陳康伯爲尚書左僕射  
朱倬右僕射並同中書門下平章事辛卯復李光左中  
大夫官其子孫二人壬辰地震庚子以前徽猷閣待制  
張宇發死節贈四官錄其子孫夏四月丁巳以久雨傷

蠶麥盜賊間發命侍從臺諫條上弭災除盜之策出天  
申節銀十萬兩加克戶部糴本辛未遣周麟之使金賀  
遷都壬申權減荆南上供錢銀絹絲米之半用招填禁  
軍是月金主亮率文武羣臣如汝洛五月癸酉朔給兩  
淮民兵荒田乙亥增築禁城戊寅詔吳拱視緩急退守  
荆南己丑命沿淮州郡毋納北人辛卯金遣高景山王  
全來賀天申節全揚言無禮致其主亮語求淮漢地及  
指取將相近臣計事且以欽宗皇帝訃聞壬辰選兩浙

江東福建諸州禁軍弓弩手之半部送樞密院按試甲  
午宰執召同安郡王楊存中及三衙帥趙密等至都堂  
議舉兵詔以王全語諭諸路統制帥守監司隨宜應變  
毋失機會是日爲欽宗皇帝發喪特詔持斬衰三年乙  
未以吳璘爲四川宣撫使仍命制置使王剛中同處置  
軍事丙申命主管馬軍司成閔部兵三萬人戍郢州庚  
子命兩浙江湖福建諸州起禁軍弓弩手部送明州平  
江府江池太平三州荆南府軍前殿中侍御史陳俊卿

言內侍張去爲竊權撓政乞斬之以作士氣六月乙巳  
以羣臣三上表始聽政丙午劉錡乞即日移軍渡江詔  
錡進發騎兵屯揚州丁未出宮女三百九十人蠲臨安  
府禁軍闕額錢五年己酉以御史中丞汪澈爲湖北京  
西宣諭使辛亥金主亮遣大懷正至盱眙語送伴使呂  
廣問云將以六月遷汴京令其歸奏癸丑罷教坊併敕  
令所歸刑部乙卯以劉錡爲淮南江東西浙西制置使  
戊午命帶御器械劉炎同提舉措置沿淮盜賊庚申彗

出角遣步軍司都統制戚方提總江上諸軍策應軍馬  
聽劉錡節制諭吳拱嚴備襄陽視緩急合田師中成閔  
兵以援之甲子始御正殿乙丑放女樂二百餘人丙寅  
聽淮南諸州移治清野戊辰以周麟之辭使北命樞密  
都承旨徐禧代行淮北民兵崔唯夫董臻等率衆萬餘  
來歸秋七月丙子命兩浙江東濱海諸州預備敵兵詔  
諸路帥臣教閱土兵弓手戊寅命雷州守臣節制高容  
廉化四州軍馬時雷州軍賊凌鐵作亂東南第十二將

高居弁會五州巡尉官兵討平之戊子周麟之分司筠  
州居住辛卯振給淮南歸正人壬辰徐嘉等至盱眙金  
主亮以非所指取之人諭遣亟還癸巳詔四川財賦自  
當專任總領所如遇警急調發不及申奏則令宣制司  
隨宜措置先舉後聞乙未行新造會子于淮浙湖北京  
西諸州是月金主亮徙都汴京命其臣劉萼由唐鄆瞰  
荆襄張中彥王彥章據秦鳳窺巴蜀蘇保衡完顏鄭嘉  
努由海道趨兩浙八月辛丑朔忠義人魏勝復海州李

寶承制以勝知州事丙午蠲諸路逋欠經總制錢江浙等路上供米丁未以婉容劉氏妾預國政廢于家蠲淮南京西北民秋稅之半辛亥以劉婉容事連坐昭慶軍承宣使王繼先福州居住停子孫官籍其貲甲寅李寶率舟師三千發江陰大風退泊明州關澳聚兵復進乙卯劉錡引兵屯揚州遣統制王剛以兵五千屯寶應丁巳召田師中赴行在尋以吳拱爲郢州諸軍都統制壬戌復用資政殿學士張燾落致仕知建康府癸亥分

處歸正人於淮南諸州能自存者從便願爲兵者籍之  
乙丑詔便宜選補戰功人後勿遞減丙寅出內帑錢七  
萬緡犒戍兵之家仍悉除軍債己巳起復成閔爲湖北  
京西制置使節制兩路軍馬九月庚午朔命大臣朝饗  
太廟辛未宗祀徽宗于明堂以配上帝大赦甲戌金人  
犯黃牛堡守將李彥堅拒却之金兵遂扼大散關吳璘  
駐青野原遣將高松等援之庚辰以給事中黃祖舜同  
知樞密院事壬午流星晝隕乙酉詔劉錡王權李顯忠

戚方嚴備清河潁河渦河口丁亥成閔渡江屯應城縣  
遣吳拱戍郢州博州民王友直聚兵大名自稱河北安  
撫制置使以其徒王任爲副遣軍師馮穀入朝奏事吳  
璘遣將彭青至寶雞渭河夜刦金人橋頭砦破之庚寅  
成閔遣統制趙搏部兵五千駐德安辛卯金國趣使臣  
書至楚州守臣以聞其辭多悖慢壬辰監財貽軍淮河  
渡夏俊復泗州癸巳金人犯通化軍守將張超拒郤之  
甲午冊謚大行皇帝曰恭文順德仁孝皇帝廟號欽宗

吳璘遣將劉海復秦州金守將蕭濟降乙未金人犯信  
陽軍丙申吳璘遣將曹琳復洮州戊戌劉錡發揚州詔  
以金人背盟降敕榜招諭中原軍民己亥蘭州漢軍千  
戶王宏殺其刺史溫屯烏也來降吳璘遣將潘青復隴  
州是月金主亮以尚書右丞李通爲大都督造浮梁于  
淮水之上遂自將來攻兵號百萬遠近大震冬十月庚  
子朔詔將親征魏勝攻沂州敗還海州金人圍之李寶  
以舟師至東海縣金人解圍去寶遂入海州辛丑金人

自渦口渡淮癸卯以吳璘兼陝西河東招討使劉錡兼  
京東河北東路招討使成閔兼京西河北西路招討使  
金人陷蔣州李顯忠遣統制孔福與金人戰于大人洲  
敗之己巳金人復犯海州魏勝李寶擊却之劉錡引兵  
次淮陰金人將自清河口入淮錡列兵于運河岸以扼  
之丁未命宣撫制置司傳檄契丹西夏高麗渤海諸國  
及河北河東陝西京東河南諸路諭出師共討金人是  
日金人立其東京留守葛王襄爲皇帝改元大定戊申

王權聞金兵大至自廬州引兵遁屯昭關己酉知筠州  
武鉅招納北界杜海等二萬人來歸庚戌復置機速房  
知廬州龔濤聞金兵將至棄城走辛亥金將蕭琦陷滁  
州守臣陸廉棄城走壬子改建王瑋爲鎮南軍節度使  
劉錡遣統制王剛等擊敗金人于清河口金人復來戰  
剛失利吳拱遣將侯俊郝敦書復唐州癸丑借江浙荆  
湖等路坊場淨利錢三百八十萬緡以備賞軍金人圍  
廬州都監權州事楊椿率兵突陣出守水砦金人又攻

海州李寶力戰敗之解圍去甲寅金人攻樊城吳拱遣  
守將翟貴王進興戰貴進俱戰死金兵亦退劉錡遣兵  
渡淮及金人戰死者十七八金主亮以大軍至廬州城  
北之五里築土城以居戚方遣將張寶復蔣州乙卯以  
金人渝盟告于天地宗廟社稷命州縣諭富民捐貲助  
國劉錡聞王權遁自淮陰引兵歸揚州丙辰金主亮入  
廬州王權自昭關遁金人追至尉子橋破敵軍統制姚  
興戰死權退保和州金州都統制王彥遣統制任天錫

出洵陽復豐陽縣丁巳帝聞王權敗召楊存中同宰執  
議于內殿陳康伯贊帝定議親征武鉅遣將苟琛復鄆  
州戊午任天錫復商洛縣命吳璘趣出兵漢中葉義問  
督視江淮軍馬中書舍人虞允文參謀軍事金人犯真  
州步軍司統制邵宏淵迎戰于胥浦橋兵敗真州陷金  
人不入城遂犯揚州己未任天錫復商州執其守完顏  
守能趙摶引兵渡淮庚申以楊存中爲御營宿衛使趙  
摶復襄信縣王權自和州遁歸屯于東采石辛酉復湯

思退觀文殿大學士充醴泉觀使兼侍讀分行在官吏  
三之一扈從餘留行遣常事金人陷和州壬戌以將士  
勞於征討避殿減膳劉錡退軍瓜州鎮金人陷揚州淮  
東安撫使劉澤棄城奔泰州以戶部侍郎劉岑爲御營  
隨軍都轉運使李顯忠爲御營先鋒都統制屯蕪湖主  
管步軍司李捧爲前軍都統制趙摶復新蔡縣癸亥募  
諸州豪民招槍仗弓箭手赴行在金人入揚州王權自  
采石夜還建康尋復如采石甲子復張浚觀文殿大學

士判潭州吳璘遣統制吳挺向起等及金人戰于德順  
軍之治平砦敗之趙摶復平興縣乙丑金人趨瓜州劉  
錡遣統領員琦拒之于阜角林大敗之斬其統軍高景  
山丙寅李寶遇金舟師于膠西縣陳家島大敗之斬完  
顏鄭嘉努等五人劉錡還鎮江府趙摶復蔡州斬其總  
管楊寓分御營宿衛爲五軍金人攻泰州向起吳挺擊  
却之丁卯葉義問至鎮江詔起江浙福建諸州彊丁赴  
江上諸軍武鉅復虢州盧氏縣任天錫復朱陽縣戊辰

殿中侍御史杜莘老劾內侍張去爲帝不悅去爲致仕  
出莘老知遂寧府十一月己巳朔邵宏淵遣統領崔臯  
及金人戰于定山敗之任天錫復號州守將蕭信遁去  
庚午通州守將蕭邦弼棄城去辛未成閔引兵發應城  
縣援淮西遣權吏部侍郎汪應辰詣浙東措置海道壬  
申以張浚判建康府召王權赴行在以李顯忠代將邵  
宏淵爲池州都統制金人犯瓜州鎮江中軍統制劉汜  
戰敗走權都統制李橫亦遁金人鐵騎奄至江上統制

魏俊王方死之葉義問惶怖欲退走復趨建康金人游騎至無爲軍守臣韓髦棄城走癸酉淮寧府民陳亨祖執同知完顏耶魯以其城來歸趙摶引兵去蔡州復陷甲戌池州統制官崔定等復入無爲軍乙亥金主亮臨江築壇刑馬祭天期以翌日南渡丙子虞允文督建康諸軍統制官張振王琪時俊戴臯等以舟師拒金主亮于東采石戰勝却之崔定復巢縣任天錫復上津商洛二縣丁丑虞允文遣水軍統制盛新以舟師擊金人于

楊林河口又敗之金主亮焚其舟而去戊寅王彥遣將  
楊堅復欒川縣己卯以湯思退爲行宮留守虛懷蠻犯  
嘉州籠蓬堡官軍大敗副將鄭祥等爲所殺庚辰金主  
亮引軍趨淮東癸未吳璘病自仙人原還興州留姚仲  
節制軍事虞允文自采石率李捧一軍及戈船如鎮江  
備敵甲申贈姚興魏俊王方官金主亮至揚州乙酉貸  
劉汜死英州編管江州統制李貴忠義首領孟俊復順  
昌府金州將邢進復華州丙戌賜戰士帛給其家薪炭

任天錫復陝州丁亥劉錡以疾罷以御營宿衛中軍統制劉銳權鎮江都統制成閔自京西還建康遂如鎮江戊子吳璘復力疾上仙人原己丑王權貸死瓊州編管李寶泛海南歸金人復攻陝州任天錫破走之復犯襄陽統制官李勝等拒却之復通化軍王彥遣將楊堅黨清至西京長水縣及金人戰敗之庚寅復長水縣癸巳以成閔爲鎮江都統制淮東制置使京東西路河北東路淮北泗宿州招討使李顯忠爲淮西制置使京畿河

北西路淮北壽亳州招討使吳拱爲湖北京西制置使  
京西北路招討使甲午武鉅遣鄉兵總轄杜隱等復嵩  
州乙未金人陷泰州是日金人弑其主亮于揚州龜山  
寺戊戌金都督府遣人持檄詣鎮江軍中議和十二月  
己亥朔趙樽夜襲蔡州復入其城王彥遣兵復福昌縣  
庚子楊存中及虞允文渡江至瓜州察金兵金人犯漢  
南之茨湖郢州軍士史俊登其舟獲一將諸軍繼進遂  
擊却之楊椿夜攻金人殺其帥高定山復廬州辛丑以

李寶爲靖海軍節度使浙西通泰海州沿海制置使京東東路招討使金統軍劉萼聞茨湖敗亦退師王彥遣將閻玘復澠池縣壬寅天有白氣以趙密爲行宮在城都總管成閔渡江之揚州癸卯命諸路招討司率兵進討互相應援沿江諸大帥條陳恢復事宜復岳州舊名右軍統領沙世堅入泰州甲辰虞允文自鎮江入見均州統領皆朝復鄧州乙巳張浚至慈湖命李顯忠引兵渡江丙午淮東統制王選復楚州丁未杜隱等入河南

府吳拱遣統領牛宏入汝州戊申帝發臨安建王從行  
庚戌金人渡淮北去壬子次平江罷督視府虞允文還  
至鎮江癸丑淮東統制劉銳陳敏引兵入泗州郢州統  
制楊欽以舟師追敗金人于洪澤鎮乙卯江北金兵盡  
去李顯忠復入和州吳璘遣將復水洛城金人復破汝  
州牛宏敗走戊午次鎮江府庚申吳璘遣將拔金人治  
平砦壬戌曲赦新復州軍甲子降淮南京西湖北雜犯  
死罪以下囚賞采石功進統制張振時俊等官金頴壽

二州巡檢高顯以壽春府來降丁卯命諸道籍鄉兵初  
王友直王任聚兵嘗命友直爲天雄軍節度使任爲天  
平軍節度使金主襄既立下令散其衆友直等自壽春  
來歸是月金主知亮已死遂趨燕京

三十二年春正月戊辰朔日有食之帝在鎮江己巳金  
人犯壽春府忠義將劉泰戰死金兵引去庚午發鎮江  
府壬申至建康府張浚入見丙子祧翼祖主于夾室己  
卯李顯忠引兵還建康庚辰罷郡守年七十者壬午金

人復犯蔡州趙摶力戰却之乙酉權知東平府耿京遣其將賈瑞掌書記辛棄疾來奏事已丑金主遣其臣高忠建等來告嗣位以耿京爲天平軍節度使知東平府庚寅詔新復州縣搜訪仗節死義之士丙申以楊存中爲江淮荆襄路宣撫使虞允文副之給事金安節中書舍人劉珙繳奏再上乃改命存中措置兩淮二月戊戌朔罷借兩浙江淮坊塲淨利錢以虞允文爲兵部尚書川陝宣諭使措置招軍市馬及與吳璘議事庚子興州

統領惠逢等復河州振兩淮饑民壬寅金人犯汝州守將王宣逆戰敗之癸卯帝發建康惠逢復積石軍又克來羌城丁未劉錡薨己酉王宣及金人再戰于汝州庚戌金人全師來攻宣敗績棄去辛亥金人復犯順昌府孟新拒却之尋亦棄去壬子賞蔡州功趙摶等進官有差乙卯至臨安府興元都統制姚仲攻鞏州不下退守甘谷城遂引兵圍德順軍丙辰金人犯蔡州趙摶擊却之戊午復引兵來攻摶又敗之金兵遁去王彥遣將馬

貴斷河中南橋金兵來攻貴戰敗之壬戌詔軍士戰死者祿其家一年傷重而死於營者半之乙丑王宣及右軍副將汲靖敗金人于蔡州確山縣趙摶棄蔡州丙寅金人復取之姚仲遣副將趙銓攻下鎮戎軍金同知渭州秦弼及其子嵩來歸王彥遣兵救陝州遇金人于虢州東敗之金兵引去丁卯吳珙遣將復永安軍永寧福昌長水三縣閏月癸酉金人破河州屠其城乙亥命楊存中李顯忠固守新復州軍量度進討丙子姚仲遣將

復原州戊寅祔欽宗主于太廟癸未振淮南歸正人金  
人犯虢州吳璘遣楊從儀等攻拔大散關分兵據和尚  
原金人走寶雞丙戌給張浚錢十九萬緡造沿江諸軍  
戰艦庚寅王剛破金人于海州辛卯楊椿罷壬辰姚仲  
攻順德軍敗金人于瓦亭砦新店是月張安國等攻殺  
耿京李寶將王世隆攻破安國執之以獻三月壬寅更  
定金使入境接伴館伴舊儀癸卯成閏遣統制杜彥赦  
淮寧擊敗金人于項城縣甲辰罷扈從官吏賞典乙巳

錄商號之功加吳璘少傅王彥爲保平軍節度使戊申  
吳璘復德順軍又遣將嚴忠取環州辛亥命兵部侍郎  
陳俊卿工部侍郎許尹經畫兩淮堡砦屯田癸丑金人  
圍淮寧府守臣陳亨祖死之甲寅吳璘自德順軍復還  
河池金人犯鎮戎軍丁巳遣洪邁等賀金主即位戊午  
忠義軍統制知蘭州王宏拔會州金人陷淮寧府統領  
戴規戰死成閔歸自淮東辛酉金人攻原州丙寅詔舉  
賢良夏四月丁卯朔姚仲遣兵救原州己巳命侍從臺

諫條上防秋足食足民策遣左武大夫都飛虎結約河  
東壬申賞御營宿衛將士四萬餘人進官有差癸酉蠲  
淮東殘破州軍上供銀絹米麥及經總制錢一年蒙縣  
民倪震率丁口數千來歸甲戌募民耕淮東荒田蠲其  
徭役及租稅七年戊寅以御史中丞汪澈參知政事金  
人圍海州戊子洪邁等辭行報聘書用敵國禮是月大  
雨淮水暴溢數百里漂沒廬舍人畜死者甚衆五月戊  
戌吳璘自河池如鳳翔巡邊姚仲遣兵救原州數敗金

人庚子復置提舉秦州買馬監命四川總領官兼權其職壬寅姚仲及金人戰于原州北嶺敗績戊申復以楊存中爲醴泉觀使奉朝請罷御營宿衛司辛亥鎮江都統制張子蓋救海州遇金人于石湫堰大敗之金人解去甲寅命張浚專一措置兩淮事務兼節制淮東西沿江州郡軍馬乙卯知順昌軍孟昭率部曲來歸己未吳璘遣將復熙州壬戌禁諸軍互招逃亡加鄭藻太尉振東北流民命張浚置御前萬弩營募淮民爲之甲子詔

立建王璋爲皇太子更名睿加成閔太尉主管殿前司  
李顯忠爲太尉主管馬軍司籍諸州歸正人願爲農者  
給官田復租十年願爲兵者赴軍中六月丙寅朔吳璘  
次大幽嶺檄召姚仲至軍前下河池獄命夔路安撫使  
李師顏代將其兵戊辰名新宮曰德壽庚午以吳珙主  
管步軍司罷三招討司甲戌加贈兄子偁爲太師中書  
令追封秀王謚安僖妻張氏封王夫人乙亥朱倬罷丙  
子詔皇太子即皇帝位帝稱太上皇帝退處德壽宮皇

后稱太上皇后孝宗即位累上尊號曰光堯壽聖憲天  
體道性仁誠德經武緯文紹業興統明謨盛烈太上皇  
帝淳熙十四年十月乙亥崩于德壽殿年八十一謚曰  
聖神武文憲孝皇帝廟號高宗十六年三月丙寅攢于  
會稽之永思陵光宗紹熙二年加謚受命中興全功至  
德聖神武文昭仁憲孝皇帝

贊曰昔夏后氏傳五世而后羿篡少康復立而祀夏周  
傳九世而厲王死于彘宣王復立而繼周漢傳十有一

世而新莽竊位光武復立而興漢晉傳四世有懷愍之  
既元帝正位於建鄴唐傳六世有安史之難肅宗即位  
于靈武宋傳九世而徽欽陷于金高宗纘圖于南京六  
君者史皆稱爲中興而有異同焉夏經羿浞周歷共和  
漢間新室更始晉唐宋則歲月相續者也蕭王琅琊皆  
出疏屬少康宣王肅宗高宗則父子相承者也至於克  
復舊物則晉元與宋高宗視四君者有餘責焉高宗恭  
儉仁厚以之繼體守文則有餘以之撥亂反正則非其

才也況時危勢逼兵弱財匱而事之難處又有甚於數君者乎君子於此蓋亦有憫高宗之心而重傷其所遭之不幸也然當其初立因四方勤王之師內相李綱外任宗澤天下之事宜無不可爲者顧乃播遷窮僻重以苗劉羣盜之亂權宜立國確虜讐哉其始惑於汪黃其終制於姦檜恬墮猥懦坐失事機甚而趙鼎張浚相繼竄斥岳飛父子竟死於大功垂成之秋一時有志之士爲之扼擊切齒帝方偷安忍耻匿怨忘親卒不免於來

世之謂悲夫


宋史卷三十二


謹案卷三十一第六頁後二行以言者追讚岳飛

按讚字疑訛

卷三十二第八頁前五行命州縣諭富民捐貲助  
國刊本捐訛損今改

金匱四庫全書





總校官庶吉士臣張能照  
校對官檢討臣蕭九成  
謄錄舉人臣李駟

欽定四庫全書叢要

史部

宋史卷三十三



詳校官編修臣王天祿

欽定四庫全書  
薈要卷五千六百六十一

史部

宋史卷三十三

元中書右丞相總裁托克托等修

紀第三十三

孝宗

孝宗紹統同道冠德昭功哲文神武明聖成孝皇帝諱  
睿字元永太祖七世孫也初太祖少子秦王德芳生英  
國公惟憲惟憲生新興侯從郁從郁生華陰侯世將世

將生慶國公令譖令譖生子偁是為秀王王夫人張氏  
夢人擁一羊遺之曰以此為識已而有娠以建炎元年  
十月戊寅生帝于秀州青衫暉之官舍紅光滿室如日  
正中少長命名伯琮及元懿太子薨高宗未有後而昭  
慈聖獻皇后亦自江西還行在后嘗感異夢密為高宗曰  
言之高宗大寤會右僕射范宗尹亦造膝以請高宗曰  
太祖以神武定天下子孫不得享之遭時多艱零落可  
憫朕若不法仁宗為天下計何以慰在天之靈於是詔

選太祖之後問知樞密院事李回曰藝祖不以大位私其子發於至誠陛下為天下遠慮合於藝祖可以昭格天命參知政事張守曰藝祖諸子不聞失德而傳位太宗過堯舜遠甚高宗曰此事不難行朕於伯字行中選擇庶幾昭穆順序而上虞丞婁寅亮亦上書言昌陵之後寂寥無聞僅同民庶藝祖在上莫肯顧歆此金人所以未悔禍也望陛下於伯字行內選太祖諸孫有賢德者高宗讀之大感歎紹興二年五月選帝育于禁中三

年二月除和州防禦使賜名瑗壬寅改貴州五年五月  
用左僕射趙鼎議立書院宮中教之既成遂以為資善  
堂帝讀書彊記天資特異己亥制授保慶軍節度使封  
建國公六月己酉聽讀資善堂以徽猷閣待制范冲兼  
翊善起居郎朱震兼贊讀高宗命帝見沖震皆拜十二  
年正月丁酉加檢校少保封普安郡王三月壬寅出閣  
就外第十三年九月秀王歿于秀州十四年正月庚辰  
用廷臣議聽解官行服十六年四月乙巳免喪還舊官

十七年六月戊午改常德軍節度使二十四年衡州盜  
起秦檜遣殿前司將官卒立將千人捕之不以聞帝入  
侍言之高宗大驚明日以問檜檜謂不足煩聖慮故不  
敢聞俟朝夕盜平則奏矣檜退知為帝言忌之及檜疾  
篤其家秘不以聞謀以子嬉代相帝又密啓高宗破其  
奸三十年二月癸酉立為皇子更名瑋甲戌詔下丙子  
制授寧國軍節度使開府儀同三司進封建王制出中  
外大悅四月賜字元瓊三十一年十月壬子以明堂恩

改鎮南軍節度使先是金人犯邊高宗下詔親征而兩淮失守朝臣多陳退避之計帝不勝其憤請率師為前驅直講史浩以疾在告聞之亟入為帝言太子不宜將兵乃為草奏因中官以進請衛從以共子職高宗因亦欲帝徧識諸將十二月遂扈蹕如金陵三十一年五月甲子立為皇太子改名睿初高宗久有禪位之意嘗以諭帝帝流涕固辭會有邊事不果及歸自金陵陳康伯求去高宗復以倦勤諭之中書舍人唐文若聞而請對

言不宜急遽故先下建儲之詔賜名燧監察御史周必  
大密與康伯言與唐昭宗名同音不可詔別擬進乃定  
今名既又命學士承旨洪遵為太子擇字遵擬四字以  
進皆不稱旨甲戌御筆賜字元永乙亥內降御札皇太  
子可即皇帝位朕稱太上皇帝退處德壽宮皇后稱太  
上皇后丙子遣中使召帝入禁中面諭之帝又推遜不  
受即趨側殿門欲還東宮高宗勉諭再三乃止於是高  
宗出御紫宸殿輔臣奏事畢高宗還宮百官移班殿門

外拜詔畢復入班殿庭頃之內侍掖帝至御榻前側立不坐內侍扶掖至七八乃略就坐宰相率百僚稱賀帝遽興輔臣升殿固請帝歎然曰君父之命出於獨斷然此大位懼不克當班退太上皇帝即駕之德壽宮帝服袍履步出祥曦殿門冒雨掖輦以行及宮門弗止上皇麾謝再三且令左右扶掖以還顧曰吾付托得人吾無憾矣左右皆呼萬歲是日詔有司議太上皇帝太上皇后尊號以聞在內諸司日輪官吏應奉德壽宮增置德

壽宮提點幹辦等官德壽宮宿衛依皇城及宮門法丁  
丑朝德壽宮戊寅大赦詔宰相率百官月兩朝德壽宮  
己卯以即位告于天地宗廟社稷庚辰詔五日一朝德  
壽宮以左武大夫龍大淵為樞密副都承旨武翼郎曾  
覲帶御器械癸未始御後殿甲申詔中外士庶陳時政  
闕失丙戌詔進宰執官二等丁亥詔以太上皇不許五  
日一朝自今月四朝復除名勒停人胡銓官知饒州己  
丑詔有司月奉德壽宮緡錢十萬辛卯詔罷四川省馬

壬辰詔百官日一人入對癸巳蝗甲午上太上皇帝尊號曰光堯壽聖太上皇帝太上皇后曰壽聖太上皇后乙未晦金人屠原州秋七月戊戌興州中軍統制吳挺復鞏州庚子判建康府張浚入見以雨水飛蝗令侍從臺諫條上民間利害壬寅詔戒飭諸郡守臣癸卯以張浚為少傅江淮宣撫使封魏國公甲辰以參知政事汪澈視師湖北京西遣劉珙等使金告即位戊申以四川宣撫使吳璘兼陝西河東路宣撫招討使追復岳飛元

官以禮改葬是夜地震大風拔木已酉有事于太廟別  
廟癸丑馬軍司中軍統制趙摶忠義軍統領皇甫倜復  
光州甲寅朝獻景靈宮詔淮南諸州存恤淮北來歸之  
民權免稅役丙辰以少保保康軍節度使吳益為少傅  
太尉寧武軍節度使吳蓋為開府儀同三司丁巳罷李  
寶措置海道戊午恩平郡王琥入見庚申以御前軍器  
所仍隸工部辛酉詔後省看詳中外上書有可采者以  
聞壬戌以黃祖舜兼權參知政事罷諸路聖節進奉詔

李顯忠軍馬聽張浚節制癸亥增將士戰傷死者推恩  
格詔蠲四川積年逋負八月乙丑朔四川馬軍統制高  
師中與金人戰于推沙敗死丙寅吳璘與金人戰于德  
順軍已巳以翰林學士史浩為參知政事戊寅率羣臣  
詣德壽宮奉上太上皇帝太上皇后尊號冊寶丁亥班  
寬恤事十八條起居舍人洪邁知閣門事張揜坐奉使  
辱命罷甲申吳璘敗金人于北山戊子追復李光資政  
殿學士趙鼎范沖並還合得恩數庚寅以生日為會慶

節追冊故妃郭氏為皇后九月甲午以子惣為少保永  
興軍節度使進封鄧王愷為雄武軍節度使開府儀同  
三司進封慶王惇為鎮洮軍節度使開府儀同三司進  
封恭王甲午金人攻德順軍東山堡中軍將李庠戰死  
丁酉詔開講日召輔臣觀講川陝宣諭使虞允文以論  
邊事不合罷己亥詔侍從臺諫舉知四川利害可為都  
轉運使者庚子以金人來索舊禮詔宰執侍從臺諫各  
陳應敵定論以聞辛丑詔吳璘審度措置保全川蜀乙

已詔纂錄勲臣名次丙午轉補朱震范沖子孫官庚戌  
謚皇后郭氏曰恭懷辛亥振淮東義兵及歸正人以總  
領四川財賦軍馬錢糧王之望為戶部侍郎川陝宣諭  
使仍命將調兵同防守興州川口乙卯詔虞允文赴吳  
璘軍議事辛酉以吳璘為少師冬十月丙寅詔朝臣舉  
堪監司郡守者戊辰以岳陽軍節度使居廣開府儀同  
三司史浩兼權知樞密院事己巳葉義問罷詔登聞鼓  
院母沮抑進狀庚午以恩平郡王璩為少保詔會慶節

權免上壽戊寅詔張浚陳俊卿覆實諸將所陳功賞改  
謚皇后郭氏曰安穆壬午官岳飛孫六人甲申契丹招  
討蕭哲伯來奔金人攻德順城吳璘擊走之復遣兵追  
襲遂為所敗乙酉升建州為建寧府戊子以資政殿學  
士張燾同知樞密院事己丑安南都護南平王李天祚  
閹婆國王悉里地茶蘭固野占城國王鄒時巴蘭並加  
食邑實封十一月庚子以蕭哲伯為忠州團練使乙巳  
金人攻水洛城丙午賜忠義軍統制皇甫倜軍帛五千

匹綿萬兩戊申詔改明年為隆興元年辛亥免楊存中  
所獻酒坊逋負錢四十萬緡甲寅定內侍官額辛酉史  
浩免權知樞密院事裁定文武臣官觀獄廟員數立措  
置京西營田司十二月乙丑詔宰臣復兼樞密使金人  
攻隴城縣官軍拒却之丙寅詔帥臣監司具部內知州  
治行臧否以聞詔棄德順城徙兵民于秦州以裏屯住  
丁卯以陳康伯兼樞密使令江淮宣撫司增招武勇效  
用軍戊辰詔侍從臺諫集議當今弊事仍命盡率其屬

使極言無隱辛未劉珙張說還自盱眙戊寅蠲四川赦  
前登帶白契稅錢丙戌詔觀察使已上各舉所知三人  
三省樞密院詳議立格以聞庚寅罷建康鎮江營田官  
兵辛卯廣西賊王宣破藤州守臣廖顥棄城遁是歲諸  
路斷大辟四十一人

隆興元年春正月壬辰朔羣臣朝于文德殿帝朝德壽  
宮立武臣薦舉格甲午四川宣撫司奉詔班師庚子以  
史浩為尚書右僕射同中書門下平章事兼樞密使張

浚進樞密使都督江淮東西路軍馬丙午誅殿前司後  
軍謀變者戊申詔禮部貢院試額增一百人丁巳詔吳  
璘軍進退可從便宜璘已棄德順道為金人所邀將士  
死者數萬計二月壬戌朔用史浩策以布衣李信為兵  
部員外郎齎蠟書間道往中原招豪傑之據有州郡者  
許以封王世襲安慶軍節度使士錢乞減奉賜之半以  
助軍用自是諸宗室有請悉從之戊辰宰執陳康伯等  
乞再減奉止存舊格之半許之己卯振兩淮流民及山

東歸正忠義軍癸未黃祖舜罷庚寅逐秦檜黨人仍禁  
輒至行在三月壬辰朔金右副元帥赫舍哩志寧以書  
取侵地癸巳以張燾為參知政事御史中丞辛次膺同  
知樞密院事葉義問落端明殿學士饒州居住丙申雨  
雹丁酉詔戶部置局議節浮費己亥楊存中等乞減半  
奉如宰執例許之庚子以龍大淵知閭門事曾覲同知  
閭門事壬寅陳康伯上欽宗陵名曰永獻乙巳詔求遺  
逸丁未詔修太上皇帝聖政罷龍大淵別與差遣曾覲

復帶御器械召張浚已酉張燾罷立選人減舉主法甲  
寅復以龍大淵知閣門事曾覲同知閣門事給事中中  
書舍人留黃不行乙卯詔飭郡縣吏庚申以久雨命有  
司振災傷察刑禁夏四月乙丑定選人改官歲額戊辰  
張浚入見議出師渡淮三省樞密院不預聞壬申賜禮  
部進士李待問以下五百三十八人及第出身乙亥壬  
之望罷壬午詔戶部臺諫議節浮費癸未詔以白金二  
十五萬兩給江淮都督府軍費戊子張浚命邵宏淵帥

師次盱眙乙丑又命李顯忠帥師次定遠是月金人拔  
環州守臣強霓及其弟震死之五月壬申申嚴鋪翠銷  
金及神祠僭擬之禁丁酉李顯忠復靈璧縣邵宏淵次  
虹縣金人拒之戊戌顯忠東趨虹縣庚子復虹縣金知  
泗州富察棟摩及同知泗州大周仁降辛丑命左右史  
日更立前殿壬寅張浚渡江視師癸卯金右翼軍都統  
蕭琦降于李顯忠甲辰顯忠及宏淵敗金人于宿州乙  
巳史浩罷追復司馬康右諫議大夫丙午復宿州戮金

兵數千人建康前軍統領官王珙卷戰死之丁未以辛  
次膺為參知政事翰林學士承旨洪遵同知樞密院事  
督諸路開營田辛亥詣德壽宮賀天申節金赫舍哩志  
寧自睢陽引兵至宿州李顯忠擊郤之壬子欽宗大祥  
帝服衰服詣几筵易祥服行祥祭禮顯忠與金人戰于  
宿州邵宏淵不援顯忠失利是夜建康中軍統制周宏  
及邵宏淵之子世雄殿前司統制官左士淵逃歸癸丑  
進李顯忠開府儀同三司淮南京畿京東河北招討使

邵宏淵檢校少保寧遠軍節度使招討副使金人攻宿  
州城顯忠大敗之殿前司統制官張訓通等七人統領  
官十二人以二將不叶而遁甲寅李顯忠邵宏淵軍大  
潰于符離己卯下詔親征丙辰召汪澈以張浚兼都督  
荆襄軍馬李顯忠邵宏淵至濠州張浚以劉寶為鎮江  
諸軍都統制丁巳以富察棟摩大周仁蕭琦並為節度  
使棟摩大同軍周仁彰國軍琦威塞軍遣御前忠勇軍  
赴都督府是月成都地震三六月庚申朔日有食之遣

內侍趣上淮東將士功賞癸亥汪澈罷張浚乞致仕且請通好皆不許丁卯以觀文殿大學士湯思退為醴泉觀使兼侍讀戊辰召虞允文以兵部侍郎周葵為參知政事汪澈落資政殿學士台州居住庚午張浚自盱眙還揚州辛未李顯忠罷軍職壬申以太傅同安郡王楊存中為御營使節制殿前司軍馬癸酉下詔罪已張浚降授特進仍前樞密使江淮東西路宣撫使官屬各奪二官邵宏淵降武義大夫職仍舊詔楊存中先詣建康

措置營砦檢視沿江守備戊寅詔展巡幸之期辛次膺  
罷己卯李顯忠責授清遠軍節度副使筠州安置辛巳  
命浙西副都總管李寶兼御營統制官措置浙西海道  
甲申右諫議大夫王大寶入對論移蹕以敷文閣學士  
虞允文為兵部尚書兼湖北京西宣諭使戊子放宮人  
三十人以蕭琦為檢校少保河北招撫使秋七月庚寅  
朔以虞允文為湖北京西制置使癸巳以湯思退為尚  
書右僕射同中書門下平章事兼樞密使李顯忠再責

授果州團練副使潭州安置乙未詔宿州棄軍將佐奪官貶竄有差丙申太白晝見經天罷江淮宣撫司便宜行事乙巳以旱蝗星變詔侍從臺諫兩省官條上時政闕失丁未詔徵李顯忠侵欺官錢金銀免籍其家乙卯裁減省部寺監官吏戊午給還岳飛田宅八月丙寅張浚復都督江淮軍馬庚午以劉寶兼淮東招撫使丙子以飛蝗風水為災避殿減膳罷借諸路職田之令戊寅金赫舍哩志寧又以書求海泗唐鄧四州地及歲幣癸

未復以龍大淵知閣門事曾覲同知閣門事丙戌遣淮  
西安撫司幹辦公事盧仲賢等齎書至金帥府戒勿許  
四州差減歲幣仍命諸將毋遣兵人出境九月己酉楊  
存中罷冬十月戊午朔大臣奏金帥書言四事帝曰四  
州地歲幣可與名分歸正人不可從辛酉御殿復膳己  
巳遣護聖軍戍江南丙子詔太上皇后教旨改稱聖旨  
立賢妃夏氏為皇后丁丑地震辛巳升洪州為隆興府  
詔江淮軍馬調發應援從都督府取旨餘事悉以聞十

一月己丑盧仲賢自宿州以金都元帥布薩忠義遺三省樞密院書來庚子遣王之望等為金國通問使辛丑詔侍從臺諫於後省集議講和遣使禮數土貢四事仍各薦可備小使者丙午盧仲賢擅許四州下大理寺奪三官召張浚癸丑以胡昉楊由義為使金通問國信所審議官十二月己未陳康伯罷乙丑張浚入見丁丑以湯思退為尚書左僕射張浚為右僕射並同中書門下平章事兼樞密使浚仍都督江淮東西路軍馬壬午西

南方有白氣是歲以兩浙大水旱蝗江東大水悉蠲其租

二年春正月辛卯詔增德壽宮車輦儀衛壬辰御文德殿冊皇后癸巳修三省法乙未及皇后朝德壽宮丙申命虞允文調兵討廣西諸盜庚子罷諸州招軍丙午金僕散忠義復以書來庚戌申嚴卿監郎官更出迭入之制壬子振歸正人甲寅白氣亘天是月福建諸州地震二月辛未蠲秀州貧民逋租壬申容州妖賊李雲作亂

癸酉復王權武義大夫命權廣西路都鈐轄專一措置  
盜賊丙子詔飭將帥減文武官及百司吏郊賜之半罷  
兩浙福建江西湖南夔州路參議官丁丑雨雹及雪獲  
李雲其黨悉平乙酉胡昉自宿州還初金帥以昉等不  
許四郡械繫之昉等不屈金主命歸之三月丙戌朔詔  
張浚視師于淮又詔王之望等以幣還丁亥詔荆襄川  
陝帥臣嚴邊備毋先事妄舉盧仲賢除名械送郴州編  
管壬寅詔知光州皇甫倜毋招納歸正人丙午王宣等

降詔三衙戍兵歸司建康鎮江大軍更番歸砦庚戌芝  
生德壽宮以戶部侍郎錢端禮為淮東宣諭使吏部侍  
郎王之望為淮西宣諭使詔撫諭兩淮軍民壬子以廣  
西賊平詔減高藤雷容四州雜犯死罪囚釋杖以下蠲  
夏秋稅賦以忠勇軍隸步軍司神勁右軍隸鎮江都統  
司癸丑以王彥為建康諸軍都統制兼淮西招撫使夏  
四月庚申召張浚還朝甲子以李顯忠侵欺官錢給還  
諸軍丁卯以建康歸正人為忠毅軍鎮江為忠順軍命

蕭琦蕭鷗巴分領之戊辰罷江淮都督府高麗入貢丁丑張浚罷癸未言者論宰相執政徇欺之弊命書寘政事堂五月壬辰復置環衛官丙申詔吳璘母招納歸正人辛丑詔劉寶量度泗州輕重取舍事宜以聞江西總管邵宏淵責授靖州團練副使南安軍安置仍徵其盜用庫錢乙巳率群臣詣德壽宮賀天申節始用樂丁未蝗詔內外贓私不法官吏尚書省置籍檢勘庚戌罷招神勁效用軍辛亥鬻兩淮所招戶馬六月甲寅朔日有

食之辛酉以淫雨詔州縣理滯囚戊辰太白晝見壬申  
命虞允文棄唐鄧允文不奉詔丁丑賑江東兩淮被水  
貧民秋七月乙酉召虞允文以戶部尚書韓仲通為湖  
北京西制置使丁亥洪遵罷己丑以周葵兼權知樞密  
院事遣主管馬軍司公事張守忠以兵詣淮西措置邊  
備庚子太白經天詔內外文武官年七十不請致仕者  
遇郊毋得蔭補己巳命海泗州徹戍丁未雨雹戊申蠲  
淮東內庫坊場錢一年庚戌洪遵落端明殿學士癸丑

以江東浙西大水詔侍從臺諫卿監郎官館職陳闢失  
及當今急務是月罷內侍押班梁珂為在外宮觀移廣  
西提刑司于容州八月甲寅朔以災異避殿減膳戊午  
南丹州莫延廩為諸蠻所逐來歸詔補修武郎命江東  
浙西守臣措置開決圍田甲子秦國大長公主薨以久  
雨決繫囚庚辰以資政殿大學士賀允中為知樞密院  
事兼參知政事辛巳詔振淮東被水州縣張浚薨壬午  
遣魏杞等為金國通問使九月甲申罷內侍李珂賜謚

甲午詔江東浙西監司守臣講明措置田事乙未交趾  
入貢丁酉嚴贓吏法辛丑以王之望為參知政事權刑  
部侍郎吳芾為給事中兼淮西宣諭使金人犯邊以久  
雨出內庫白金四十萬兩糴米賑貧民壬寅王彥帥師  
濟江軍昭闕癸卯命湯思退都督江淮東西路軍馬辭  
不行乙巳復命楊存中為同都督錢端禮吳芾並為都  
督府參贊軍事罷宣諭司仍易國書以付魏杞少保崇  
信軍節度使趙密落致仕權領殿前司職事冬十月甲

寅魏杞至盱眙金帥以國書未如式弗受欲得商泰地及俘獲人且邀歲幣三十萬杞未得進丁卯賀允中罷為資政殿大學士致仕己巳以周葵兼權知樞密院事王之望兼同知樞密院事庚午詔輔臣夕對便殿丙子大風庚辰蠲京西北湖北運糧所經州縣秋稅之半以靖海軍節度使李寶為沿海駐劄御前水軍都統制辛巳金人分道渡淮劉寶棄楚州遁十一月乙酉知楚州魏勝與金人戰死之州遂陷濠州亦陷王彥棄昭關遁滁

州又陷丙戌詔諭沿邊將士丁亥詔魏杞等以所賚禮  
幣犒軍杞弗從命留鎮江候旨復命王之望督視江淮  
軍馬戊子以金人侵擾詔郊祀改用明年又詔諭歸正  
官民軍士命王之望同都督江淮軍馬湯思退罷都督  
召陳康伯己丑王之望罷同都督庚寅命楊存中都督  
江淮軍馬辛卯湯思退罷尋以尹楷晁公武論之落觀  
文殿大學士永州居住未至而卒甲午以黃榜禁太學  
生伏闕是日太學生張觀等七十二人上書請斬湯思

退王之望尹稽竄其黨洪适晁公武而用陳康伯胡銓等以濟大計丙申遣國信所大通事王抃持周葵書如金帥府請正皇帝號為叔姪之國易歲貢為歲幣減十萬割商秦地歸被俘人惟叛亡者不與誓目大略與紹興同以金人犯淮南詔避殿減膳丁酉詔擇日視師戊戌以少保觀文殿大學士陳康伯為尚書左僕射同中書門下平章事兼樞密使庚子遣兵部侍郎胡銓右諫議大夫尹稽分詣兩浙措置海道贈魏勝寧國軍節度

使謚忠壯辛丑兵部尚書錢端禮賜出身簽書樞密院  
事兼提領德壽宮壬寅詔侍從兩省官日一至都堂議  
事有關臺諫者亦聽會議以顯謨閣學士虞允文同簽  
書樞密院事癸卯遣王之望勞師江上甲辰金人犯六  
合縣步軍司統制崔臯擊却之乙巳以錢端禮兼權參  
知政事丁未以顯謨閣直學士沈介為沿江制置使命  
沿江諸州調保甲分守渡口己酉劉寶落節鉞為武泰  
軍承宣使王彥落龍神衛四廂都指揮使閏月甲寅陳

康伯入見詔康伯間日一朝肩輿至殿門給扶升殿丙辰周葵罷王抃見金二帥皆得其報書以歸戊午蕭琦卒壬戌詔罷胡銓尹稽丙寅召韓仲通以沈介為兵部尚書湖北北京西制置使戊辰以金人且退詔督府擇利擊之王之望執不可乙亥之望罷丙子以王抃為奉使全國通間國信所參議官持陳康伯報書以行丁丑金遣張恭愈來迓使者詔臺諫侍從兩省官舉楚廬滌濠四州守臣十二月甲申罷陝西路轉運司戊子魏杞始

渡淮詔郊祀大禮遵至道典故改用來年正月一日上  
辛辛卯以錢端禮為參知政事兼知樞密院事虞允文  
同知樞密院事兼權參知政事禮部尚書王剛中簽書  
樞密院事內申制曰比遣王抃遠抵潁濱得其要約尋  
澶淵盟誓之信倣大遼書題之儀正皇帝之稱為叔姪  
之國歲幣減十萬之數地界如紹興之時憐彼此之無  
辜約叛亡之不遣可使歸正之士咸起寧居之心重念  
數州之民罹此一時之難老穉有蕩析之裁丁壯有係

累之苦宜推蕩滌之宥少慰彫殘之情應沿邊被兵州  
軍除逃遁官吏不赦外雜犯死罪情輕者減一等餘並  
放遣遣洪适等賀金主生辰詔吳挺市馬赴行在己亥  
雨雹壬寅罷三衙江上荆襄諸軍招軍甲辰遣沿海水  
軍還屯己酉朝獻景靈宮庚戌朝饗太廟

乾道元年春正月辛亥朔合祀天地于圜丘大赦改元  
丁巳淮西安撫韓璡勒停賀州編管庚申以錢端禮兼  
德壽宮使辛酉召楊存中通問使魏杞至燕山丁卯以

王抃使金有勞進五官庚午西北方有白氣詔館職更  
迭補外卒未立兩淮守令勸民種桑賞壬申詔兩浙振  
流民以紹興流民多死罷守臣徐嘉及兩縣令癸酉蠲  
沿邊殘破州軍官賦一年甲戌劉寶責果州團練副使  
瓊州安置乙亥罷兩淮招撫司及陝西河東宣撫招討  
司丙子淮西守將孔福以遇敵棄城伏誅頓遇奪官刺  
面配吉陽軍牢城二月庚辰朔朝德壽宮從太上皇太  
上皇后幸四聖觀乙酉罷江淮都督府遣官檢察兩淮

州縣振濟饑民庚寅雨雹癸巳移濠州戍兵于藕塘庚子以楊存中為寧遠昭慶軍節度使甲辰以久雨避殿減膳蠲兩淮災傷州縣身丁錢絹決繫囚丁未陳康伯薨謚文恭三月甲寅太白晝見己未御殿復膳庚申以虞允文為參知政事兼同知樞密院事王剛中同知樞密院事命淮西湖北荆襄帥臣措置屯田復置榷場癸亥黃祖舜薨戊辰白氣亘天己巳罷諸軍額外制領將佐乙亥太白經天是春湖南盜起入廣東焚掠州縣官

軍討平之夏四月庚子金報問使完顏仲等入見乙巳  
吳璘入見五月庚戌以璘為太傅封新安郡王丙辰詔  
有司治皇后家廟壬戌詔監司帥守講究弊端以聞合  
廣南東西路監事為一司癸亥詔總領帥漕臣諸軍都  
統制並兼提領措置屯田沿邊守臣兼管屯田事丁卯  
詔吳璘措置馬綱水路壬申蠲四川州縣虛額錢吳璘  
改判興元府乙亥詔未銓試人毋得堂除丙子遣李若  
川等使金賀上尊號增置諸路鉅轄都監郴州盜李金

等復作亂遣兵討捕之六月癸未王剛中薨乙酉詔恭  
王府直講王淮傾邪不正有違禮經可與外任丙戌以  
翰林學士洪适簽書樞密院事戊子步軍司統制官崔  
臯坐奏功冒濫奪所遷觀察使止進橫行三官令本軍  
自效辛卯以武經郎令德為安定郡壬辰以淮南轉  
運判官姚岳言境內飛蝗自死奪一官罷之丙申以兩  
淮守令勞徳安集無效下詔戒飭之仍以詔置守令治  
所壬寅蠲廣東殘破郡縣稅賦甲辰罷湖北京西制置

司秋七月辛亥詔知州年七十以上者與官觀癸丑輔  
臣晚對選德殿御坐後有大屏記注諸道監司郡守姓  
名因令都堂視此書之甲寅借職田租二年以裨經費  
己未鑄當二錢己巳蠲關外四州民今年租稅及湖南  
賊踪郡縣夏稅八月己卯以永豐圩田賜建康都統司  
癸未獲李金乙酉詔立子愭為皇太子丁亥虞允文罷  
戊子大赦己丑以洪适為參知政事兼權知樞密院事  
吏部侍郎葉顥簽書樞密院事兼權參知政事庚寅立

知州軍諸路總管銓轄都監辭見法癸巳錢端禮以避  
東宮親嫌罷為資政殿大學士提舉萬壽觀戊戌吏部  
侍郎章服以論虞允文阿附罷謫居汀州九月乙卯立  
廣國夫人錢氏為皇太子妃丁巳申嚴百司官出入局  
之制丁卯升鼎州為常德府甲戌以端明殿學士汪澈  
知樞密院事洪适兼同知樞密院事乙亥置沿淮諸州  
都巡檢冬十月己卯遣方慈等使金賀正旦戊子增頭  
子錢歸正人右通直郎劉蘊古坐以軍器法式送北境

伏誅壬辰御大慶殿冊皇太子癸巳詣德壽宮稱謝乙未詔侍從各舉所知宗室一二人丁酉金遣高衍等來賀會慶節乙巳淮北紅巾賊踰淮刦掠立賞討捕之已而知楚州胡明遣巡尉擊殺其首蕭榮十一月辛亥招收兩淮流散忠義人丙寅白氣亘天辛未遣龍大淵撫諭兩淮措置屯田督捕盜賊十二月戊寅以洪适為尚書右僕射同中書門下平章事兼樞密使汪澈為樞密使命廣東提刑司招安李金餘黨癸未遣王曠等賀金

主生辰庚寅以葉顥為參知政事兼同知樞密院事辛卯詔侍從臺諫兩省舉堪監司郡守者各一人三衙知閣舉材武可守邊者一人庚子罷兩淮諸州權攝呂壬寅金遣烏古論忠弼等來賀明年正旦癸卯詔樞密院文書依三省式經中書門下畫黃書讀至正

二年春正月辛酉省六合戍兵以所墾田給還復業之民辛未命湖南監司存恤寇盜殘破郡縣二月丁丑罷盱眙屯田振兩浙江東饑戊寅幸玉津園宴射遂幸龍

井三月乙巳禁京西利州路科役保勝義士壬子詔戒  
飭刑獄官戊午殿中侍御史王伯庠請裁定奏薦詔三  
省臺諫集議具條式以聞詔縣令非兩任母除監察御  
史非任守臣母除郎官著為令丁卯賜禮部進士蕭國  
梁以下四百九十有三人及第出身戊辰再增諸州軍  
離軍添差員闕辛未罷洪适右僕射癸酉以給事中權  
吏部尚書魏杞同知樞密院事兼權參知政事丁丑罷  
和糴夏四月戊寅以久雨命侍從臺諫議刑政所宜以

聞減大理三衙臨安府及浙西州縣雜犯死罪以下囚  
一等釋杖以下庚辰詔兩浙漕臣王炎開平江湖秀園  
田辛巳避殿減膳甲申太白晝見癸巳御殿復膳乙未  
汪澈罷丁酉以知江南府李道憑恃戚里妄作罷之五  
月戊申張壽薨己酉罷權借職田庚戌葉顥罷以魏杞  
為參知政事右諫議大夫林安宅同知樞密院事兼權  
參知政事中書舍人蔣芾簽書樞密院事癸丑太白晝  
見經天禁浙西修築園田罷修建康行宮丁卯命監司

守臣預備水旱六月甲戌罷兩浙路提舉市舶司詔諸  
路監司帥臣各察守令臧否以聞丙子刑部上乾道新  
編特旨斷例戊寅詔制科權罷注疏出題守臣監司亦  
許解送庚辰封孫挺為福州觀察使榮國公摠為左千  
牛衛大將軍癸未詔使相母奏補文資七色補官人母  
任子堂吏遷朝議大夫以五員為額乙酉申嚴内外牒  
式法裁其額丙戌廢永豐圩戊戌詔改官人實歷知縣  
一任方許關升著為定式秋七月己酉調泉州左翼軍

二千人屯許浦鎮甲寅以鎮江都統制戚方為武當軍  
節度使八月辛未朔詔兩淮行鐵錢銅錢母過江北癸酉  
以武鋒軍隸步軍司甲戌罷任子年三十得免試參  
選之令丁丑蠲淮南放歸萬弩手差役二年壬午詔諸  
州守臣兼訓練禁軍癸未降會子交子于鎮江建康務  
場令江淮之人對換丙戌林安宅効葉顥之子受金失  
實罷之丁亥詔安宅筠州居住溫州大水戊子以魏杞  
兼同知樞密院事蔣希權參知政事召葉顥庚寅少保

新興郡王吳蓋薨甲午立中興以來十三處戰功格目  
乙未詔吳璘復判興州丙申升宣州為寧國府罷戶部  
諸路歲糴一年九月甲辰知上元縣李允升犯贓貸死  
杖脊刺面配惠州牢城籍其貲丙午建康守臣王佐坐  
縱允升去官奪三官勒停建昌軍居住餘失按官吏及  
薦舉官奪官有差辛亥遣官按視溫州水災振貧民決  
繫囚乙卯詔改造大厯辛酉追封子恪為邵王謚曰悼  
肅甲子詔監司各舉部內知縣縣令二三人守臣各舉

屬縣一二入己巳魏杞等上神宗哲宗徽宗三朝帝紀  
太上皇聖政太白晝見是月詔舉將師置章奏簿冬十  
月癸酉上太上皇聖政于德壽宮乙亥遣薛良朋等使  
金賀正旦己卯減饒州歲貢金三之一蠲諸路酒坊逋  
賦戊子知峽州呂令問坐縱贓吏知夷陵縣韓贊胄去  
官奪二官鄂州居住辛卯雨雹金遣魏子平等來賀會  
慶節十一月丙午楊存中薨己酉盡出內藏及南庫銀  
以易會子官司並以錢銀支遣民間從便兩淮總領所

許自造會子鬻諸路營田壬子詔修祥曦殿記注乙卯  
密詔四川制置使汪應辰如吳璘不起收其宣撫使牌  
印權行主管職事甲子大閱戊辰築郢州城是月詔汰  
冗兵十二月庚午朔白氣亘天癸酉詔三省侍從臺諫  
兩淮漕臣郡守條具兩淮鐵錢交子利害以聞乙亥遣  
梁克家等賀金主生辰己卯以資政殿學士葉顥知樞  
密院事辛巳詔免進呈欽宗日歷送國史院修纂實錄  
壬午追封楊存中為和王甲申以葉顥為尚書左僕射

魏杞右僕射並同中書門下平章事兼樞密使蔣芾參  
知政事吏部尚書陳俊卿同知樞密院事兼權參知政  
事庚寅詔宰相領兼制國用使參知政事同知國用事  
矣已詔監司守臣舉廉吏丙申金遣烏古論元忠等來  
賀明年正旦以江東兵馬鈐轄王朴為帶御器械是歲  
裁定内外軍額

宋史卷三十三

欽定四庫全書叢要卷五千六百六十二

史部

宋史卷三十四

元中書右丞相總裁托克托等修

本紀第三十四

孝宗二

三年春正月甲辰詔廷尉大理官母以獄情白宰執探  
刺旨意為輕重庚戌置三省戶房國用司初以國用匱  
乏罷江州屯駐軍馬至是復留之癸亥罷銅錢過江之

禁裁定利州西路諸軍額二月壬申詔國用司月上宮  
禁及百司官吏三衙將士請給之數癸酉出龍大淵為  
江東總管曾覲為淮西總管甲戌大淵改浙東覲改福  
建乙亥罷成都潼州路轉運司輪年銓試以其事付制  
置司辛巳以端明殿學士虞允文知樞密院事癸未雨  
雹甲申為知陳州陳亨祖立廟于光州賜名愍忠丙戌  
以武經龜鑑孫子賜鎮江都統戚方建康都統劉源癸  
巳措置淮東山水砦丙申從太上皇太上皇后幸玉津

國戊戌直秘閣前廣東提刑石敦義犯贓刺面配柳州  
籍其家正月甲辰從太上皇太上皇后幸聚景園辛亥  
詣德壽宮恭請裁定醫官員額丁巳詔四川宣撫司創  
招千人置司所在屯駐壬戌伯母秀王夫人張氏薨夏  
四月辛未蠲諸路州軍逋負癸酉為秀王夫人成服  
于後苑百官進名奉慰丁丑合利州東西路為一戊寅  
以吳璘知興元府充利州路安撫使四川宣撫使五月  
癸卯葉顥等上三祖下仙源積慶圖及太宗真宗玉牒

哲宗寶訓甲寅吳璘薨庚申命四川制置使汪應辰主  
管宣撫司事移司利州修揚州城壬戌大減三衙官屬  
六月己巳命汪應辰權節制利州路屯駐御前軍馬辛  
未復分利州東西路為二甲戌以虞允文為資政殿大  
學士四川宣撫使乙亥金遣使來取被俘人詔實俘在  
民間者還之軍中人及叛亡者不預戊寅復以虞允文  
為知樞密院事充宣撫使帝親書九事戒之罷淮西江  
東總領所營田募人耕佃壯丁各還本屯癃老存留戚

年請給甲申詔鎮江都統制戚方武鋒軍都統制陳敏各上清河口戰守之策追封吳璘為信王丁亥詔後省參致理檢院典故辛卯皇后夏氏崩振泉州水災秋七月己亥立薦舉改官額壬寅以皇太子疾減雜犯死罪囚釋流以下乙巳皇太子薨謚曰莊文己酉東宮醫官杜揖除名昭州編管尋改瓊州閏月辛未詔諸軍復置副都統制文字與都統制連書軍馬調發從都統制違者奏劾戚方罷癸酉擢攢安恭皇后于臨安修吉寺丁

亥戚方落節鉞信州居住八月丁酉內侍陳瑜李宗回坐交結戚方受賂瑜除名決杖黥面配循州宗回除名筠州編管方責受果州團練副使潭州安置籍所盜庫金以犒軍甲寅以久雨命臨安府決繫囚丁巳葉顥等請罷不許蠲光濤廬三州壽春府賦一年戊午遣官分決滯獄壬戌以知建康府史正志兼沿江水軍制置使自鹽官至郢州沿江南北及沿海十五州水軍悉隸之癸亥詔給舍討論考課舊法四川旱賜制置司度牒四

百備振濟九月戊子太白晝見冬十月乙未朔占城入貢丁酉遣唐瑜等使金賀正旦戊戌修真州城以嗣濮王士鵠為開府儀同三司庚子定內外薦舉改官人歲額癸卯詔歸正借補官資人充樞密院効士於指定州軍以官庫酒息贍之者毋罷其給乙卯金遣富寧索羅窩等來賀會慶節十一月丙寅合祀天地于圜丘大赦戊辰雷己巳詔戒飭武臣及百官癸酉以郊祀雷葉顥魏杞並罷命陳俊卿為參知政事翰林學士劉珙同知

樞密院事甲戌蔣芾陳俊卿請罷不許丁丑以雷發非時詔臺諫侍從兩省官指陳闕失辛巳詔侍從兩省臺諫卿監郎官舉堪郎官寺監丞監司郡守者癸巳罷川路馬船十二月丙申增修六合城己亥遣王淪賀金主生辰乙巳置豐儲倉增印會子辛亥以吳益為太傅庚申金遣徒單忠衛等來賀明年正旦是歲兩浙水四川旱江東西湖南北路蝗振之

四年春正月戊辰籍荆南義勇民兵增給衣甲遇農隙

日番教壬午奪秦塙秦堪郊恩蔭補癸未雨雹甲申幸  
天竺寺遂幸玉津園辛卯罷吳益郊恩蔭補壬辰葉顥  
薨二月甲午朔罷福建路賣鈔鹽蠲轉運司歲發鈔鹽  
錢十五萬緡詔四川宣撫使虞允文集四路漕臣會計  
財賦所入對立兵額丁酉命湖北安撫司給田募辰沅  
靖三州刀弩手戊戌置和州鑄錢監己亥以蔣芾為尚  
書右僕射同中書門下平章事兼樞密使兼制國用使  
觀文殿大學士史浩為四川制置使浩辭不行庚子詔

蔣芾常朝贊拜不名芾辭許之乙巳賜王炎出身簽書  
樞密院事癸丑五星皆見乙卯雪雨雹三月庚午以敷  
文閣待制晁公武為四川安撫制置使戊寅詔贈果州  
團練使韓崇岳立廟賜名忠勇宣州觀察使朱勇立廟  
賜名忠節己丑四方霧下若塵庚寅蠲楚州壯丁社民  
稅役謚陳亨祖曰愍節夏四月乙未置漢陽軍収發馬  
鹽詔官吏非犯公罪毋得引用併計案問發己亥置郢  
州轉般倉癸卯遣使撫邛蜀二州饑民為亂者己酉追

封韓世忠為蘄王甲寅蔣芾等上欽宗帝紀實錄丙辰  
禮部員外郎李燾上所著續通鑑長編自建隆至治平  
一百八卷丁巳詔大使局參用新舊歷戊午詔販牛過  
淮者論如興販軍須之罪是月振綿漢等州饑五月癸  
亥出度牒千道續減四川科調乙丑太白晝見以邛州  
安仁縣荒旱失于蠲放致饑民擾亂守貳縣令降罷追  
停有差甲申謚趙鼎曰忠簡丙戌行乾道新歷丁亥以  
饒信二州建寧府饑民嘯聚遣官措置振濟是月西夏

任敬德遣使至四川宣撫司約發兵攻西番六月辛卯  
朔太白晝見經天甲午詔罷廣西鈔鹽復官船官賣法  
歲減轉運司鈔錢十九萬緡其秋苗母得科折戊戌蠲  
諸路逋負乾道元年二月和市折帛雜色錢辛丑龍大  
淵卒詔以為寧武軍節度使致仕五星皆見癸卯詔四  
川宣撫司增印錢引一百萬對償民間預借錢蠲印蜀  
二州夏稅丁巳召興化軍布衣林象赴行在戊午蔣芾  
以母喪去位秋七月壬戌以劉珙兼參知政事召建寧

府布衣魏掞之赴行在申禁異服異樂癸亥徽州大水  
己巳罷沿江水軍制置司辛未衢州大水戊寅知衢州  
王悅以盛暑禱雨蔬食減膳憂勤致疾而死贈直龍圖  
閣丁亥以經總制餘剩錢二十一萬緡椿留邛蜀州以  
備振濟己丑以久雨御延和殿慮囚減臨安府三衙死  
罪以下囚釋杖以下是月西夏遣間使來八月乙未班  
祈雨雪之法于諸路己亥五星皆見丁未主管殿前司  
公事王琪傳旨不實擅興工役降三官放罷庚戌劉珙

罷辛亥陳俊卿請罷政不許九月庚申立内外將佐升  
差審察法庚午從太上皇幸天竺寺限品官子孫名田  
是秋罷關外四州營田官兵募民耕佃冬十月壬辰遣  
鄭聞等使金賀正旦甲午禁歸正人藏匿金人者乙未  
臣僚言天下之事必歷而後知試而後見為縣令者必  
為丞簿為郡守者必為通判為監司者必為郡守皆有  
等差自今職事官吏局務官必任滿方許求外未歷親  
民任使即未得擬州郡且授通判詔從之庚子蔣芾起

復尚書左僕射陳俊卿右僕射並同中書門下平章事  
兼樞密使兼制國用使甲辰大閱己酉金遣移刺神獨  
幹等來賀會慶節庚戌大風十一月壬戌遣知無為軍  
徐子寅措置楚州官田招集歸正忠義人以耕甲戌嚴  
盜賊法乙亥詔峽州布衣郭雍赴行在壬申兩淮歸正  
忠義有田產者蠲役五年癸未岳陽軍節度使居廣封  
永陽郡王十二月丙申遣胡元質等賀金主生辰甲辰  
賜魏掞之同進士出身為太學錄蔣芾辭起復許之減

兩浙江東西路明年夏稅和市之半甲寅金遣完顏仲仁等來賀明年正旦

五年春正月甲戌措置兩淮屯田二月己丑詔申嚴太廟季點法乙未命楚州兵馬鈴轄羊滋專一措置沿淮海盜賊先是海州人時旺聚衆數千來請命旺尋為金人所獲其徒渡淮而南者甚衆故命滋彈壓之戊戌贈張浚太師謚忠獻壬寅以給事中梁克家簽書樞密院事癸卯大風甲辰以王炎參知政事兼同知樞密院事

丙午雨雹辛亥詔自今詔令未經兩省書讀者毋輒行  
給舍駁正母連衡同奏三月丁巳朔詔趣修廬和二州  
城己巳蠲成都府路民戶歲輸對糴米腳錢三十五萬  
緡乙亥以王炎為四川宣撫使仍參知政事召虞允文  
赴行在丙子賜禮部進士鄭僑以下三百九十有二人  
及第出身壬午賜郭雍號沖晦處士癸未罷利州路諸  
州營田官兵募民耕佃詔侍從監司帥臣管軍薦武舉  
出身人可將佐者夏四月己丑復置將作軍器少監壬

辰以梁克家兼參知政事辛丑詔福建路貧民生子官  
給錢米庚戌修襄陽府城辛亥振恤衢婺饑信四州流  
民五月己巳帝以射弩弦斷傷目不視朝金牒取俘獲  
人王抃議盡遣時旺餘黨陳俊卿持不可帝然之六月  
庚寅太白晝見戊戌始視朝己酉以虞允文為樞密使  
秋七月乙丑曾覲入見陳俊卿及虞允文請罷之不  
許覲至行在俊卿允文復言其不可留詔以覲為浙東  
總管八月甲申朔日有食之己丑以陳俊卿為尚書左

僕射虞允文為尚書右僕射並同中書門下平章事兼  
樞密使兼制國用使辛亥命淮西路鑄小鐵錢九月己  
未罷淮東屯田官兵募民耕佃辛酉詔淮東諸州農隙  
教閱民丁甲子詔侍從臺諫集議欽宗配饗功臣壬申  
大風命淮西安撫司參議官許子中措置淮西山水砦  
招集歸正忠義人耕墾官田冬十月乙酉遣汪大猷等  
使金賀正旦戊子振溫台二州被水貧民以守臣監司  
失職降責有差戊戌大風己亥命饒信二州歲各留上

供米三萬石以備振耀癸卯金遣高德基等來賀會慶  
節十一月癸丑朔復置淮東萬弩手名神勁軍庚申增  
置廣東水軍乙丑以孫濬為右千牛衛大將軍以明州  
定海縣水軍為御前水軍丙寅為岳飛立廟于郢州己  
巳太白晝見辛未詔侍從臺諫兩省官各舉歲朝官以  
上才堪監司郡守者三人壬申復成閔慶遠軍節度使  
鎮江諸軍都統制十二月己丑遣司馬伋等賀金主生  
辰辛卯大風丁酉置應城縣馬監復李顯忠威武軍節

度使乙巳復置成都府廣惠倉戊申金遣完顏毅等來  
賀明年正旦

六年春正月癸丑雅州沙平蠻寇邊焚碉門砦四川制  
置使晁公武調兵討之失利乙卯修楚州城丁巳復強  
盜舊法其四年十一月指揮勿行癸亥初降金字牌下  
四川宣撫司備邊奏己丑增築豐儲倉庚午以奉國軍  
承宣使知廬州郭振為武泰軍節度使二月乙酉詔戶  
部侍郎二人分領諸路財賦丁亥復置舒州同安監鑄

鐵錢辛卯王炎遣人約沙平蠻歸部稍捐邊稅與之丙申廣西路復行鈔鹽法仍增收通貨錢四十萬緡以備漕計壬寅詔諭大臣均役法嚴限田抑游手務農桑己酉置應城縣孳生監庚戌以曾覲為福州觀察使遣司農寺丞許子忠詣淮西措置鐵錢三月癸丑用三省官兩淮守帥宜久其任二年後察其能否以行賞罰乙卯裁減樞密院吏額一百十有四人丁巳詔步軍司權以三萬五千人為額以王抃僉知閭門事專一措置三衙

揀選官兵贈彰國軍節度使大周仁為太尉庚申從太上皇太上皇后幸聚景園乙丑以晁公武王炎不協罷四川制置司歸宣撫司辛未從太上皇太上皇后幸聚景園甲戌裁減三省吏額七十人戊寅以知紹興府史浩為檢校少傅保寧軍節度使己卯詔兩淮州縣官以繁簡易其任復置江浙荆湖兩廣福建等路都大發運使以新知成都府史正志為之夏四月辛巳朔罷鑄錢司歸發運司併淮東總領所歸淮西總領所以敷文閣

直學士張震知成都府充本路安撫使乙未賜發運使  
史正志緡錢二百萬為均輸和糴之用吏部尚書汪應  
辰三上疏論發運司戊戌以應辰知平江府五月甲寅  
裁減六部吏額百五十人其餘百司三衙以是為差己  
未陳俊卿虞允文等上神宗哲宗徽宗欽宗四朝會要  
太上皇玉牒己巳陳俊卿以議遣使不合罷為觀文殿  
大學士知福州罷行在至鎮江征稅所比近者十有三  
甲戌詔誡飭百官丁丑知潮州曾造犯贓貸命南雄州

編管籍其家戊寅詔給舍臺諫言事閏月壬午詔監司  
帥臣舉守令贓否失實依舉清要官法定罪甲申即給  
諸州上供綱目季申而歲校之以為殿最戊子遣范成  
大等使金求陵寢地且請更定受書禮辛卯吏部侍郎  
陳良祐論祈請使不當遣恐生邊釁詔以良祐妄興異  
論不忠不孝放罷送筠州居住癸巳增環衛官奉以梁  
克家為參知政事兼同知樞密院事壬寅以江東漕臣  
黃石不親按行水災州郡降二官甲辰辛次膺薨戊申

復置武臣提刑六月壬子申嚴鄉監郎官更迭補外之制壬申增武學生為百人癸酉置蘄州蘄春監黃州齊安監鑄鐵錢是月榮國公挺自東宮出居外第秋七月癸未詔以沙田蘆場歲收租稅六十餘萬緡入左藏南庫丙戌詔川廣監司郡守任滿奏事訖方調已丑置興國軍興國監甲午詔除郎官並引對畢供職辛丑復置御前弓馬子弟所命吳挺兼提舉賜岳飛廟曰忠烈八月庚戌虞允文請鑿建太子癸丑復置詳定一司勅令

所內賓置閭門舍人十員是月虞允文上乾道勅令格  
式九月壬辰賜蘇軾謚曰文忠辛丑沅州猺人相讐殺  
守臣孫叔傑出兵擊之失利猺人進逼州城安撫司諭  
解之叔傑尋抵罪是月范成大至自金金許以遷奉及  
歸欽廟梓宮而不易受書禮冬十月己酉以孫摶為左  
千牛衛大將軍丙辰詔發運使置司行在謚司馬朴曰  
忠潔辛酉遣呂正巳等使金賀正旦丁卯金遣耶律子  
敬等來賀會慶節甲戌起居舍人趙雄請置局議恢復

詔以雄為中書舍人十一月丁丑朔復置軍器監一員  
壬午合祀天地于圜丘大赦乙未復置神武中軍以吳  
挺為都統制召曾覲提舉佑神觀丁酉加上光堯壽聖  
太上皇帝尊號曰光堯壽聖憲天體道太上皇帝壽聖  
太上皇后尊號曰壽聖明慈太上皇后是月遣趙雄等  
賀金主生辰別函書請更受書之禮置左藏南上庫十  
二月戊申大閱甲子置江州廣寧監臨江軍豐餘監撫  
州裕國監鑄鐵錢壬申金遣富察愿等來賀明年正旦

癸酉罷發運司以史正志奏課不實責為楚州團練副使永州安置是歲兩浙江東西福建水旱

七年春正月丙子率羣臣奉上太上皇太上皇后冊寶于德壽宮庚辰虞允文復請建太子帝命允文擬詔以進壬寅命三省旬錄宣諭聖語及時政記同進是月復鑄錢司二月癸丑詔立子惇為皇太子大赦以慶王愷為雄武保寧軍節度使判寧國府進封魏王丁巳增置皇太子宮講讀官庚申罷會子庫仍賜戶部內藏南庫

緝錢二百萬銀九十萬兩以增給官兵之奉甲子詔寺  
觀母免稅役丁卯太傅大寧郡王吳益薨壬申大風三  
月乙亥朔趙雄至金金拒其請詔訓習水軍丙子立恭  
王夫人李氏為皇太子妃戊寅徙侍衛馬軍司戌建康  
己卯起復劉珙同知樞密院事以明州觀察使知閭門  
事兼樞密都承旨張說簽書樞密院事左司員外郎兼  
侍講張栻言說不宜執政乙酉立沿海州軍私齎銅錢  
下海船法丙戌復置將作監殿中侍御史李處全乞遣

張說按行邊戍以息衆論中書舍人范成大乞不草詞  
戊子說罷為安慶軍節度使提舉萬壽觀庚寅遣使覈  
兩淮種麥內申御大慶殿冊皇太子禮部侍郎鄭閭工  
部侍郎胡銓樞密院檢詳文字李衡秘書丞潘慈明並  
罷虞允文乞留銓乃以為寶文閣待制兼侍講己亥皇  
太子謝于紫宸殿宰相率百官赴東宮賀夏四月戊申  
以曾覲為安德軍承宣使庚申詔諸路增收無額錢物  
並輸南上庫壬戌從太上皇太上皇后幸聚景園甲子

詔皇太子判臨安府己巳詔侍從臺諫兩省官舉任刑  
獄錢穀及有智略吏能者各二人辛未詔皇太子領臨  
安尹五月戊寅復置淮東總領所丁亥劉珙起復同知  
樞密院事為荊襄宣撫使珙辭不拜庚寅金人葬欽宗  
于鞏原丁酉詔廣西帥臣措置南丹州市馬是月遣知  
閣門事王抃點閱荆襄軍馬六月丙午復主管馬軍司  
公事李顯忠為太尉己巳賜吳璘謚曰武順壬申詔兩  
淮墾田毋創增稅賦秋七月庚子以王炎為樞密使四

川宣撫使八月丙辰詔兩淮民丁充民兵者本名丁錢  
勿輸辛酉復修襄陽城九月壬申朔以江西湖南旱命  
募民為兵甲申從太上皇太上皇后幸東園戊子安定  
郡王令德薨冬十月丁未罷紹興宗正行司改恩平郡  
王璩判西外宗正己酉遣莫濛等使金賀正旦壬戌金  
遣烏凌阿天錫等來賀會慶節天錫要帝降榻問金主  
起居虞允文請帝還內僉知閭門事王抃諭天錫以明  
日見天錫沮退癸亥會慶節金使隨班入見十一月甲

戊御集英殿策試應賢良方正能直言極諫科李垕戊寅錫垕制科出身十二月丁未遣翟綏等賀金主生辰庚申詔閣門舍人依文臣館閣以次輪對癸亥罷太醫局丙寅金遣完顏宗寧等來賀明年正旦是歲湖南江東西路旱振之

八年春正月庚午朔班乾道勅令格式丁酉朝獻景靈宮遂幸天竺寺玉津園二月乙巳詔改尚書左右僕射同中書門下平章事為左右丞相丙午詔六察分隸事

有違戾許監察御史隨事具實狀糾劾以間戊申遣姚憲等使金賀上尊號附請受書之事辛亥以虞允文為左丞相梁克家為右丞相並兼樞密使癸丑以安慶軍節度使張說吏部侍郎王之奇並簽書樞密院事侍御史李衡右正言王希呂交章論說不可為執政不報禮部侍郎兼直學士院周必大不草答詔權給事中莫濟封還錄黃詔並與在外宮觀丙辰詔罷王希呂與遠小監當尋詔與宮觀丁巳李衡罷為起居郎丙寅戶部尚

書曾懷賜出身參知政事三月戊子詔省侍中中書尚  
書令員以左右丞相克其位夏四月庚子賜禮部進士  
黃定以下三百八十有九人及第出身己酉殿中侍御  
史蕭之敏劾虞允文擅權不公允文請罷政許之翼日  
復留出之敏提點江東刑獄甲子措置兩淮官田徐子  
寅等坐授田歸正人逃亡奪官有差乙丑詔再蠲兩淮  
二稅一年五月戊子福建鹽行鈔法丙申立宗室銓試  
法六月庚子以武德郎令棟為金州觀察使封安定郡

壬寅蠲兩淮歸正人撮收課子淮東巡尉有縱逸歸  
正戶口過淮者奪官有差壬子省監司薦舉員秋七月  
辛巳罷淮西屯田官兵募歸正人耕佃姚憲曾覲至自  
金金人拒其請癸未以覲爲武泰軍節度使壬辰雨雹  
九月戊辰定江西四監鐵錢額乙亥詔王炎赴都堂治  
事戊寅以虞允文爲少保武安軍節度使四川宣撫使  
封雍國公己丑賜允文家廟祭器壬辰允文入辭帝諭  
以決策親征令允文治兵竣報冬十月丁未遣馮樽等

使金賀正旦丙辰金遣瓜爾佳清臣等來賀會慶節罷借  
諸路職田十一月辛未遣官鬻江浙福建二廣湖南八  
路官田辛巳復四川諸州教授田庚寅進檢校少傅知  
福州史浩開府儀同三司十二月戊戌蠲兩淮明年租  
賦甲辰詔京西招集歸正人授田如兩淮甲寅四川試  
武舉丙辰追封劉光世爲安成郡王丁巳遣韓元吉等  
賀金主生辰庚申復置鑄錢司提點官二員辛酉金遣  
曹望之等來賀明年正旦是歲隆興府江筠州臨江興

國軍大旱四川水

九年春正月辛未王之奇罷為淮南安撫使王炎罷為觀文殿大學士提舉洞霄宮乙亥以張說同知樞密院事戶部侍郎沈夏簽書樞密院事戊寅遣官鬻兩浙營田及沒官田次及江東西四川如之以刑部尚書鄭聞簽書樞密院事乙酉福建鹽復官賣法是月以措置兩淮荆襄十六事勅安撫轉運司督諸州守臣月具所行事奏仍審擇臧否以議黜陟閏月戊申以久雨命大理

三衙臨安府及兩浙州縣決繫囚減雜犯死罪以下一等釋杖以下乙卯修廬州城辛酉大風幸天竺寺玉津園二月壬申蠲江西旱傷五州逋負米乙亥青羌奴兒結寇安靜砦黎州推官黎商老戰死乙酉孫榮國公挺薨追封豫國公丁亥特贈蘇軾為太師三月甲午禁北界博易銀絹戊申從太上皇太上皇后幸聚景園癸丑復以進奏院隸門下後省丙辰復分淮南安撫司為東西路夏四月丁丑裁定武鋒軍軍額己丑皇太子解臨

安尹事五月壬辰朔日有食之己未以迪功郎朱熹屢  
詔不起特改宣教郎主管台州崇道觀六月甲戌禁兩  
淮荆襄四川諸州籍民戶馬已丑戒飭監司守令勸農  
秋七月壬寅青羌奴兒結降辛亥吐蕃彌羌畜列陷安  
靜砦引兵深入黎州守臣誘邛部川蠻擊却之八月丙  
子詔興修水利癸未合荆郢二軍爲一以吳挺充都統  
制九月丙申梁克家等上中興會要太上皇及皇帝玉  
牒庚子命盱眙軍以受書禮移牒泗州示金生辰使金

使不從冬十月甲子遣留正等使金賀正旦右丞相梁克家與同知樞密院張說議使事不合乃求去辛未克家罷爲觀文殿大學士知建寧府壬申裔雲見甲戌以曾懷爲右丞相張說知樞密院事鄭聞參知政事沈夏同知樞密院事庚辰金遣完顏襄等來賀會慶節丁亥襄等入辭別函申議受書之禮仍示虞允文速爲邊備十一月辛卯詔樞密院除授及財賦事關中書門下省其邊機軍政更不錄送戊戌合祀天地于圜丘大赦改

明年爲淳熙元年十二月己未朔戒勅沿邊諸軍毋輒  
遣間探招納叛亡甲子沈夏罷乙丑以御史中丞姚憲  
簽書樞密院事遣韓彥直等賀金主生辰辛未交趾入  
貢癸酉罷廣西客鈔鹽復官般官賣法甲戌遣使措置  
宜州市馬乙亥以嗣濮王士謁永陽郡王居廣並爲少  
保乙酉金遣完顏璋等來賀明年正旦以議受書禮不  
合詔俟改日以太上皇有旨姑聽仍舊丁亥璋等入見  
是歲浙東江東西湖北旱

淳熙元年春正月乙未禁淮西諸關採伐林木戊戌罷坐倉糴米賞庚子罷兩淮將帥權攝官丙午禁兩淮耕牛出境以交趾入貢詔賜國名安南封南平王李天祚爲安南國王二月癸酉虞允文薨辛巳爲郭浩立廟于金州三月戊子朔詔寄祿官及選人並去左右字丙申以鄭聞爲資政殿大學士四川宣撫使戊申幸玉津園癸丑金遣梁肅等來計事夏四月戊辰從太上皇幸聚景園壬申許桂陽軍谿洞子弟入州學聽讀乙亥詔四

川宣撫司教閱諸州將兵戊寅遣張子顏等使金報聘  
己卯以姚憲參知政事戶部尚書葉衡簽書樞密院事  
五月壬寅班鄭興裔所創檢驗格目六月丙辰朔詔禮  
官討論別建四祖廟正太祖東嚮位戊午以興州都統  
制吳挺爲定江軍節度使癸酉改江陵府爲荊南府戊  
寅曾懷罷癸未姚憲罷甲申落憲端明殿學士罷宮觀  
以葉衡參知政事秋七月丁亥以鄭聞參知政事罷四  
川宣撫司以成都府路安撫使薛良朋爲四川安撫制

置使戊子詔舉廉吏壬辰以曾懷爲右丞相己酉姚憲  
南康軍居住八月己未張說罷爲太尉提舉隆興府玉  
隆觀以徽猷閣學士楊倓爲昭慶軍節度使簽書樞密  
院事九月乙酉朔以曾覲開府儀同三司壬寅幸玉津  
園宴射乙巳罷宜州市馬冬十月辛酉立金銀出界罪  
賞壬戌遣蔡洸使金賀元旦癸亥以積雨命中外決繫  
囚丙寅鄭聞薨乙亥金遣完顏讓等來賀會慶節戊寅  
占城入貢辛巳再蠲林安府民身丁錢三年壬午以魏

王愷判明州蠲郴州桂陽軍借貸常平米十一月甲申  
朔日有食之戊戌以禮部侍郎龔茂良參知政事楊傑  
罷以葉衡兼權知樞密院事丙午曾懷罷戊申以葉衡  
爲右丞相兼樞密使十二月丁巳以吏部尚書李彥穎  
簽書樞密院事壬戌遣吳琚等賀金主生辰丙辰罷鐵  
錢改鑄銅錢庚午詔禮官論復魏悼王襲封壬申葉衡  
等上真宗玉牒金遣劉仲誨等來賀明年正旦以資政  
殿學士知江陵府沈夏升大學士爲四川宣撫使仍命

升差從主帥場務還軍中新四川制置使范成大改管  
内制置使

二年春正月癸巳前宰相梁克家曾懷坐擅改堂除克  
家落觀文殿學士懷降爲觀文殿學士甲午廢同安斲  
春監丁未以兩淮諸莊歸正人安業徐子寅等行賞有  
差庚戌詔籍諸軍子弟爲背嵬軍三月丙申以太上皇  
壽七十詔禮官討論慶壽典禮乙巳詔武舉第一人補  
秉義郎堂除諸軍計議官夏四月乙卯賜禮部進士詹

駿以下四百二十有六人及第出身已已幸玉津園是  
月茶寇賴文政起湖北轉入湖南江西官軍數爲所敗  
命江州都統皇甫倜招之五月辛卯諭宰相以朝政闕  
失士民皆得獻言庚子命鄂州都統李川調兵捕茶寇  
乙巳詔知縣三年爲任六月庚戌朔詔自今宰執侍從  
以下除外任非有功績者不除職名外任人非有勞效  
亦不除職以沈夏同知樞密院事辛酉罷四川宣撫司  
以倉部郎中辛棄疾爲江西提刑節制諸軍討捕茶寇

丁卯用左司諫湯邦彥言落蔣芾王炎觀文殿大學士  
張說落節度使芾建昌軍炎袁州說撫州並居住戊辰  
振濟湖南江西被寇州縣是月茶寇自湖南犯廣東秋  
七月辛丑有星孛于西方八月丙辰江西總管賈和仲  
以捕茶寇失律除名賀州編管甲子賜安南國王印丁  
卯蠲湖南江西被寇州縣租稅丁丑遣左司諫湯邦彥  
等使金申議九月乙卯朔湯邦彥請分揚廬州荆南襄  
陽府金州興元府興州爲七路每路文臣一人充安撫

使以治民武臣一人充都總管以治兵三載視其成以  
議誅賞從之乙酉振恤淮南水旱州縣乙未葉衡罷丁  
未沈夏罷贈趙鼎爲太傅還其爵邑追封豐國公閏月  
丁巳以李彥頴參知政事翰林學士王淮簽書樞密院  
事甲子詔武臣從軍毋帶內職是月辛棄疾誘賴文政  
殺之茶寇平冬十月戊寅朔賞平茶寇功湖南江西廣  
東監帥黜陟有差庚辰大風壬午詣德壽宮加上光堯  
壽聖憲天體道太上皇帝尊號曰光堯壽聖憲天體道

性仁誠德經武緯文太上皇帝壽聖明慈太上皇后尊號曰壽聖齊明廣慈太上皇后乙酉遣謝廓然等使金賀正旦戊戌金遣完顏禧等來賀會慶節十一月戊申朔奉上太上皇太上皇后冊寶于德壽宮庚戌麗正門內火癸丑大風戊午提點坑治王揖進羨餘十萬緝詔却之十二月辛巳班淳熙吏部七司法遣張宗元等賀金主生辰甲午朝德壽宮行慶壽禮大赦文武官封父母賞諸軍議放天下苗稅三之一大臣言國用不足迺

止丙申更定強盜贓法甲辰金遣完顏迨等來賀明年  
正旦

三年春正月甲寅以常州旱寬其逋負之半刪犯贓陰  
補法振淮東饑仍命貸貧民種乙丑振恤歸正人二月  
壬午蠲兩淮教閱民兵夏稅癸未以伯圭爲安德軍節  
度使甲申詔四川監司帥守聞命之官毋候告勅賜韓  
世忠謚曰忠武是月罷諸路鬻沒官田三月丙午朔日  
有食之霧雲不見辛亥上太上皇日歷于德壽宮已未

置六部編勅司癸亥幸報恩寺遂幸聚景園己巳併左藏四庫爲二辛未詔四川制置司歲擇梁洋義士材武者二人遣赴樞密院壬申立任子參選覆試法夏四月戊寅詔侍從臺諫兩省官歲舉監司郡守各五人辛巳靖州猺人寇邊遣兵討捕之丁亥雨雹己丑責授葉衡安德軍節度副使彬州安置丁酉湯邦彥陳雷奉使無狀除名邦彥新州雷永州編管己亥詔諸路提刑歲五月理囚五月癸丑合利州東西路爲一安南國王李天

祚卒戊午遣使弔祭壬申太白晝見六月乙酉減四川  
酒課四十七萬餘緡甲午以朱熹屢詔不起特命爲祕  
書郎熹不就秋七月乙丑禁浙西園田八月乙亥以王  
淮同知樞密院事禮部尚書趙雄簽書樞密院事詔六  
察官糾察庶務臺綱益振各進二官庚辰太上皇詔立  
貴妃謝氏爲皇后壬午以久雨命中外決繫囚戊戌靖  
州猺寇平九月癸亥詔自今犯公罪至死者其蔭補具  
所犯奏裁著爲令冬十月甲戌以久雨命中外決繫囚

丙子御文德殿冊皇后丁丑命臨安守臣嚴禁踰侈庚辰詔自今非歉歲不許鬻爵癸未遣閻蒼舒等使金賀正旦壬辰金遣富察通等來賀會慶節十一月癸丑合祀天地于圜丘大赦庚午遣張子正等賀金主生辰十二月己丑黎州蠻寇邊官軍失利蠻亦遁去甲午詔職事官補外者復除職如故事追封吳玠爲涪王丁酉定鑄錢司歲鑄額爲十五萬緡戊戌金遣劉珙等來賀明年正旦是歲京西湖北諸州興元府金洋州旱紹興府

台婺州水並振之

四年春正月戊申詔自今內外諸軍歲一閱試庚申詔  
沿江諸軍歲再督水戰丙寅雨雹丁卯班淳熙歷二月  
乙亥幸太學祇謁先聖退御敦化堂命國子祭酒林光  
朝講中庸下詔遂幸武學謁武成王廟監學官進秩一  
等諸生推恩賜帛有差己卯詔諸軍毋以未補官人任  
軍職戊子立邊人逃入溪洞及告捕法癸巳立武臣授  
環衛官法戊戌以新知荆南府胡元質爲四川安撫制

置使兼知成都府三月乙巳以史浩爲少保觀文殿大學士醴泉觀使兼侍讀進封永國公己酉龔茂良等上仁宗玉牒徽宗實錄皇帝玉牒庚戌幸玉津園宴射壬子貸隨郢二州饑民米詔李龍翰襲封安南國王甲寅修韶州城丙寅幸聚景園夏四月甲戌以魏王愷爲荆南集慶軍節度使行江陵尹判明州如故乙亥參知政事龔茂良以曾覲從騎不避道杖之戊寅上奏乞罷政不許甲午給歸正官子孫田屋五月庚子朔幸佑聖觀

罷四川和糴六月丁丑龔茂良罷己卯以王淮參知政  
事辛巳班幸學詔癸未升蜀州爲崇慶府甲申詔自今  
宰執朝殿得旨事須覆奏乃行秋七月辛丑禁江上諸  
軍盜易戰馬振襄陽饑民壬寅立待補太學試法戊申  
班御史臺彈奏格乙酉罷臨川伯王雱從祀癸丑龔茂  
良責授寧遠軍節度副使英州安置甲寅申嚴四川入  
蕃茶禁甲子班淳熙重修勅令格式八月辛巳禁耕牛  
過淮九月丁酉朔日有食之己亥命修築海潮所壞塘

岸辛丑免宰執以下會慶節進奉庚戌命禮官定開寶  
政和祀禮戊午閱蹴踘于選德殿冬十月丙子以久陰  
命中外決繫囚遣錢良臣等使金賀正旦丁丑詔監司  
守臣歲舉武臣堪知縣者各二人己卯詔將士智勇傑  
出者躡等升差丁亥金遣完顏忠等來賀會慶節十一  
月丁酉詔兩淮歸正人爲強勇軍庚子以趙雄同知樞  
密院事壬戌太白晝見癸亥遣趙思等賀金主生辰十  
二月丁卯試四川所上義士二人官而遣之己巳詔行

薦舉事實格法乙亥大閱辛巳蠲太平州民貸常平錢  
米壬辰金遣完顏炳等來賀明年正旦是歲福州建寧  
府南劍州水並振之

宋史卷三十四

宋史卷三十四 考證

孝宗紀二壽聖太上皇后尊號曰壽聖明慈太上皇后

○臣蒲封按玉堂雜記初議太上皇后加慈明二字

議者謂天聖二年賜太宗女申國大長公主謚曰慈  
明當避於是改用明慈二字


宋史卷三十四 考證

謹案卷三十三第三頁後三行太子不宜將兵按

此時孝宗未立為太子此太字應作皇

金匱正圖名言





總校官庶吉士臣張能照

校對官檢討臣蕭九成

謄錄貢生臣江長鑑